



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ალ-ბალაზური აჰმად იბნ იაჰია იბნ ჯაბირ

ალ-ბალაზური აჰმად იბნ იაჰია იბნ ჯაბირ (დაახლ. 820–892), არაბი ისტორიკოსი. ავტორი თხზულებებისა „ნარჩინებულთა გენეალოგია“ („ანსაბ ალ-აშრაფი“) და „ქვეყნების დაპყრობა“ („ფუთუჰ ალ-ბულდანი“). პირველი წიგნი შეიცავს ჩრდ. არაბული ტომებისა და კურაიშების წრიდან გამოსულ პირთა ბიოგრაფიებს, იგი მნიშვნელოვანი წყაროა ომაიანთა სახალიფოსა და ხარიჯიტების მოძრაობის ისტორიისათვის. „ქვეყნების დაპყრობა“ ძირითადად არაბთა დაპყრობითი ომების ისტორიას აღწერს მაჰმადის დროიდან ავტორის გარდაცვალებამდე. განსაკუთრებული მნიშვნელობა ენიჭება მას კავკასიის ისტორიისათვის. წიგნში საგანგებო თავები აქვთ დათმობილი აზერბ. და არმენიის (არაბთა მიერ სამხ. კავკასიაში შექმნილი ადმ. ერთეული, რ-შიც შედიოდა სომხეთი, ალბანეთი და საქართველო) დაპყრობას. მოთხრობილია არმენიისა და მისი მმართველი ვალიების, თბილისისა და საქართველოს სხვა მხარეების დაპყრობისა და „დაცვის სიგელების“ გაცემის შესახებ. ბ. დანვრილებით აღწერს ჰაბიბ იბნ მასლამას ლაშქრობას საქართველოში. ქართველებს უცდიათ წინააღმდეგობის განწევა არაბებისათვის. თბილისის დამორჩილებამდე, ქალაქის მისადგომებთან ისინი ორჯერ შეტაკებიან მტერს. პირველად გაუმარჯვნიათ, მაგრამ მერე დამარცხებულან და არაბებთან მოლაპარაკება უმჯობინებიათ. ჰაბიბთან მისულა ჯურზანის (ქართლის) მოსახლეობისა და პატრიკიოსის მოციქული, მორჩილება გამოუცხადებია, ძღვენი მიურთმევია და ზავისა და შეუვალობის წიგნი უთხოვია.

საინტერესოა ბ-ის თხზულების ის ნაწილიც, სადაც საქართველოს დანარჩენი პუნქტების დაპყრობაზეა საუბარი. ესენია: ხუნანი, სამცხე, გარდაბანი, შავშეთი, ბაზალეთი, კლარჯეთი, თრიალეთი, კახეთი, კუხეთი, არტანი, დარიალანი და სხვ. ბ-მა შემოგვინახა ჰაბიბ იბნ მასლამას „დაცვის სიგელის“ ერთ-ერთი უძველესი ვარიანტი და ჯარაჰ იბნ აბდ ალ-ლაჰის სიგელის ერთადერთი ჩვენთვის ცნობილი ნუსხა. საინტერესოა ცნობები თბილ.

ამირების, მათი დამოუკიდებლობისათვის ბრძოლისა და საქართველოში ბულა თურქის ლაშქრობის შესახებ. საქართვე. ისტორიისათვის საინტერესოა აგრეთვე ბ-ის ცნობები არაბ. შრიფტზე, კანცელარიებში არაბ. ენის შემოღებაზე, არაბ. გადასახადებზე, მონეტებსა და სამონეტო საქმეზე.

თბზ.: Книга завоевания стран, пер. проф. И. К. Жузе, Баку, 1927.

ლიტ.: ნ ე რ ე თ ე ლ ი გ., არაბული ქრესტომათია, თბ., 1949.

ე. სიხარულიძე
